

Sa Kap Pase ak Tibebe W La?

Devlopman Tibebe W la



Vizit 18 Mwa

Timoun piti yo renmen fè sanblan, sa ki fè lavi amizan e souvan trè komik.

18-24 MWA: Sa Kap Pase?

Kisa Tibebe W La Ka Fè

Map aprann nouvo mo chak jou.

- Mwen ka di jiska 50–100 mo disi mwen rive nan dezyèm anivèsè nesans mwen an.
- Mwen ka menm mete de (2) mo ansanm pou fè premye fraz mwen yo!



Mwen bezwen èd pou m kòmanse aprann kontwòl tèt mwen.

- Mwen konprann *non* men mwen toujou pa ka kontwòl santiman mwen ak aksyon mwen yo.
- Mwen santi mwen fristre lè mwen pa ka fè yon bagay poukont mwen. Tanpri pran pasyans avè m!

Kisa Ou Ka Fè

Transforme mo ak ekspresyon pitit ou a an fraz. Lè yo di w: "Plis lèt," ou ka di, "Èske mwen ka gen yon ti lèt an plis? Wi, dakò!" Sa fè li posib pou anseye plis langaj.



Pale pandan wap li. Poze pitit ou a kesyon sou foto ak istwa ou li ansanm ak li.

Mete mo sou santiman pitit ou a. "Mwen konnen ou fache anpil paske mwen etenn videyo a. Li nòmal pou w santi w fache. Olye de videyo a, èske ou ta renmen li oubyen jwe ak blòk kounye a?"

Li istwa sou santiman yo. Lè ou ede pitit ou a aprann mo pou dekri santiman li yo, sa ede l jere yo.

Pandan wap itilize feyè HealthySteps yo, sonje pitit ou a ka devlope kapasite l pi vit oubyen pi dousman pase sa ki make nan feyè yo e atoutsa lap grandi trè byen. Chak timoun devlope nan pwòp vitès pa yo. Espesyalis HealthySteps ou a ap disponib pou reponn nenpòt kesyon ou genyen. Kwayans ak valè kiltirèl fanmi w se faktè enpòtan tou ki fasonnen devlopman pitit ou a.

Sa Kap Pase?

Kisa Tibebe W La Ka Fè

Mwen kòmanse itilize imajinasyon mwen.

- Mwen ka bay poupe mwen an fo manje.
- Mwen ka fè bri *vwooum* lè map jwe ak machin.

Mwen se yon ti syantifik, mwen toujou ap teste bagay yo!

- Mwen renmen plen epi vide, ouvri epi fèmen bagay yo pou m wè kijan yo fonksyone.
- Mwen ka kòmanse triye objè yo. Mwen kapab mete tout tren mwen yo nan yon pil epi tout machin mwen yo nan yon lòt.

Mwen ap vin konpetan nan rezoud pwoblèm.

- Mwen ka soufle sou manje mwen lè ou di m manje a cho oubyen eseye mete pwòp jakèt mwen.

Kisa Ou Ka Fè

Jwe fè sanblan ak pitit ou a. Petèt ou ka yon ti chen kap jape, kap kouri dèyè yon boul.

Deklanche imajinasyon pitit ou a ak rad abiye, desen bèt, blòk, manje ak veso plastik.

Ede pitit ou a aprann ranje. Fè pitit ou a ede w klase lesiv la lè li mete chosèt nan yon pil ak chemiz nan yon lòt.

Itilize anpil mo matematik tankou gwo/piti, wo/kout, rapid/lan, pandan tout jounen ou. Konte etap oubyen atik manje pou w anseye sekans nimewo yo.

Ede pitit ou a rezoud yon pwoblèm men pa fè tout bagay pou li. Plis yo fè, se plis yo aprann.

Lòt Bagay Pou w Konnen ak Eseye

Teste se yon pati nan devlopman an sante yon timoun piti. Fason ou reyaji fè yon gwo diferans nan sa pitit ou a aprann ak fason li konpòte li. Lè ou enpoze limit:

- ☐ Rete klè sou règ yo. Timoun piti yo bezwen rapèl paske memwa yo toujou ap devlope. Di "Tanpri mete blòk yo nan bwat la," olye pou di "Ranje jwèt ou yo."
- ☐ Rete konsistan. Itilize menm konsekans yo pou w ede timoun piti w la aprann kòz ak efè. Pa egzanp, chak fwa pitit ou a jete yon blòk nan kay la, mete l sou kote pandan kèk minit.
- ☐ Rete kalm. Tout timoun renmen teste règ yo. Plis ou reyaji yon fason ki kalm, se plis wap reyisi nan anseye pitit ou a pou l kontwole tèt li.

Pandan vizit sa a, ekip pedyatrik la ap mezire longè, pwa ak sikonferans tèt pitit ou a. Yo pral koute batman kè pitit ou a epi egzamine je, zòrèy, nen ak bouch li. Pitit ou a pral pran tout vaksen ki nesèsè yo. Nou pral pale sou devlopman ak abidite pitit ou a, tankou dòmi ak manje. Nou pral revize konsèy sekirite yo tou. Epi, byennantand, nou pral pran tan pou diskite sou nenpòt kesyon oswa enkyetid ou ka genyen!